



**“LAGLAGIPENYO DAGITI NAKASKASDAAW NGA INARAMID TI APO”  
(Salmo 105:5)**

*Surat Pastoral a Mangrambak ti Maika-40 a Panagtinnawen ti EDSA People Power*

Patpatgek a Kakabsat,

Grasia ken kappia manipud ken Apotayo a Jesucristo!

“*Laglagipenyo dagiti nakaskasdaaw nga inaramid ti Apo,*” imbilin ti Salmo kadagiti Israelita iti panangsangoda kadagiti adu a panagsagaba bayat ti panagdaliasatda nga agturing iti daga nga ikari ti Dios.

Uppat a pulo a tawen kalpasan daydi panangtippuogtayo ti diktaturia a nanggandat a mangitultuloy ti panagarina babaen ti panagswitik iti eleksion (*electoral fraud*), mangngegantayo ti Salmo ita a mangipalagip kadayo kadagiti nakaskasdaaw a banag nga inar-aramid ti Apo bayat ti panangsarangettayo met kadagiti karit ti agdama a panawen.

Idi 1986, kalpasan ti adu a tawen a panagsagaba, sangsangkamaysatayo a nangipukkaw, “*Tama na! Sobra na! Palitan na!*” Manipud maika-22 agingga maika-25 ti Pebrero iti dayta a tawen, nakitatayo no kasano a dagiti Pilipino situtured ngem kasta met a sikakappia a nangilatak kadagiti kalsada ti nakaro a pannakalpaay ken umada kadagiti mapasasamak iti pagilian. Nagbalin ti atiddog a kalsada ti EDSA a kas nalawa a katedral ti pammati ken natalna a pannakilaban. Minilyon a Pilipino manipud nadumaduma a sulit ti pagilian ti nagtitipon iti babaen ti nainaan a pannalaknib ni Nainggasatan a Birhen Maria ken ni Jesus nga anakna. Siiiggem ken nagkarkararag iti Santo Rosario, nangidatdaton ti Nasantoan a Misa, nagkankanta – Datayo kas umili, timmakdertayo, abaga-iti-abaga, ket sinangotayo dagiti tangke ken soldado a siiima-ima, siaarmas laeng iti natibker a pammati nga adda kadagiti puspusotayo.

Naparmek ti diktaturia, saan a babaen ti ranggas ngem babaen ti natalna a panagpursige ken ti bileg ti pammati a mangbirok ti hustisia ken napudno a panagbalbaliw.

Daytoy naisangsangayan a pasamak ket saan a nairanrana laeng, saan a maysa a balligi a gagangay a magun-od ti tao. Daytoy ket testamento ketdi ti parabur ti Dios kadagiti tattaona, a nangbirok Kenkuana iti nasipngat nga orasda. Ti pammati ken ti panagayat iti pagilian ti namagkaysa kadayo. Naipangag dagiti kararagtayo. Napasamak ti ‘Milagro ti EDSA: ti *People Power*’.

Ita, kaduatayo dagiti amin a Pilipino a managayat iti kappia, rambakantayo ti maika-40 a panagtinnawen ti *People Power*. Agyamantayo iti gracia a namagbanag iti daytoy.

Iti panagrambaktayo, dakami nga obispoyo (CBCP) kiddawenmi nga aramidenyo ti tallo a nasagradoan nga annong: manglagip, agbabawi, sumungbat – iti kasta, sumangbay manen kadayo ti espiritu dayta a milagro ket idanonnatayo iti naim-imbag a masakbayan.

**Manglagip**

Ti umuna a rebhengtayo ket ti manglagip. Lagipentayo dagiti di-mainaganan a banuar, isuda a pudno a puso ti *People Power*: ti ina a nangikalasag iti soldado babaen ti bagina, dagiti naka-*wheelchair* a lallakay ken babbaket a nagkarkararag iti Santo Rosario iti baet dagiti napigsa nga ungor dagiti lugluga ken dagiti agtutubo a

namagsisilpo kadagiti takkiagda tapno tumakderda a kas barikada. Impakitada ti pudno a bileg ti pammati a mangmuli iti baro a kagimongan nga awan ti agayus a dara. Ti panangsaksida ti pammati dinadaelna ti kawar a nangparigat ti pagilian. Napaneknekan a nabilbileg ti kararag ngem dagiti tangke. Ti pammati pinarmekna ti panagbuteng.

Annongtayo a pagtalinaeden a sumsumged ti apuy ti EDSA, isu a nagangtan 40 a tawenen ti napalabas. Agtaeng koma manen ti kinatured kadagiti puspusotayo ken pasgeden ti pammati ti pasnektayo a mangtunton ti pagimbagantayo a padapada, saan laeng nga agpaay kadatayo iti agdama ngem uray pay kadagiti sumaruno a kaputotan. Saritaentayo manen ti istoria ti EDSA.

### **Agbabawi**

Maamiristayo a sinayangtayo ti sagut ti EDSA nga isu ti parbangon ti baro a pannakawayawaya. Naruamtayo a masaysayang daytoy, ket saantayon nga ikankano wenna ipateg. Nalipatantayo a ti wayawaya ket annong ken pagrebbengan. Inyaleng-alengtayo ti gundaway a mangrugi manen.

Kas kadagidi Israelita, kalpasan daydi ipapanawda diay Egipto, nalipatantayo ti kinapudno ken kinaimbag ti Dios. Nagsublitayo kadagiti daan a wagastayo – kababalin a mangted nam-ay kadatayo ngem malipatan met dagiti agrigrigat a kakabsattayo. Saantayo nga inako ken intungpal ti pagrebbengantayo a bangonen ti pagilientayo. Ngarud, kaskasdi a kasla narba a pasdek ti pagilientayo. Marnektayon iti kastoy a kasasaad. Yantangay awan met ti panagtignaytayo, ipalpalubostayo ti panagraira ti makaiskandalo a kurapsion ken ti panaggundaway nga awan panagbuteng iti panangdusa ti linteg (*impunity*). Ket gapu kadagitoy, saantay laeng a liniputan dagiti bagbagitayo, liniputantayo pay ti Dios.

Amangan no ditay mabigbig, matmatmatandatayo dagiti pakakitaan ti panagliputtayo: agtultuloy a kinarigat ti biag, panaggun-od iti kalikagum iti swiniswitik nga aramid, nadadael a talek, nakirang a panagrang-ay. Imballaag ti Nasantoan a Surat, “Nagbasol amin a tattao ket agkurangda” (Rom 3:23), ket ipalagipna kadatayo a ti pannakapalintegtayo maaramid babaen ti napakumbaba a pammati, saan ket a babaen ti ipagarup a bukod a kinasingpet.

Ti panagbabawi iduronnatayo a mangsango kadagiti basbasoltayo – ti panangpalubostayo kadagiti sistema ken istruktura a manglais ti kari ti EDSA. Agkumpesartayo a sibabawi dagiti puspusotayo, panawantayo ti balitok a sinan-toro a baka ti materialismo ket agsublitayo iti Dios nga iti naminsan nangwayawayan kadatayo.

### **Sumungbat a Situtered ken iti Ayat**

Riniingnatayo ti EDSA ket agtultuloy ti panangawagna kadatayo. Kas iti Exodo, ti EDSA impakitana a tapno magun-od ti wayawaya kasapulan ti kinatured. Kas iti Pentecostes, ti EDSA imparangna a no adda panagkaykaysa mapabaro ti panagtignay para iti mision. Ita, maawagantayo, saan laeng a tapno manglagip ken agbabawi, no di pay ket tapno sumungbat a situtered ken siaayat babaen ti panagbalbaliw.

*Ti panagbalbaliw sapulenna ti kinapudno.* Saantayo koma a maum-uma a mangtunton ken mangitakder iti kinapudno ken paiden ti kinaulbod. Ti kinaulbod abbonganna dagiti sugat ken kinakurapaytayo.

*Ti panagbalbaliw agtaud iti ayat. Ti ayat ket aramid.* No awan ti ayat, agtultuloy ti panagsagabatayo. Dagiti ubbaw nga *slogan* ken karkari ep-ependa apagbiit dagiti ut-ot ngem ditay pulos maimbagan.

*Ti panagbalbaliw kaipapananna ti personal a panagbalbaliw.* Iti inaldaw, ikarigatantayo ti agbiag nga addaan integridad a maipakita iti panagaramid ti

naimbag uray awan ti makaimatang. Daytoy ket wagas pay tapno matallikudantayo ti kinaulbod ken swiniswitik nga aramid.

*Ti panagbalbaliw kaipapananna pay ti sangsangkamaysa a panagbalbaliw ti amin.* Mauksob koma kadagiti institusion ken gimgimongtayo dagiti daan a kababalin a mangtagtaginayon ti kurapsion. Ket no agrabahotayo a sangsangkamaysa, ad-adu ti maaramidantayo.

Ti EDSA People Power ti natalna a wagastayo a nangibanag ti panagbalbaliw. Dinawatna kadatayo ti tured, sakripisio ken ayat. Ket nagtignaytayo a sangsangkamaysa.

Isingasingmi man ti sumagmamano a konkreto nga aramid kas panangrambak ti maika-40 a tawen ti EDSA:

**Labanantayo a sangsangkamaysa ti impunity.** Ang “*impunity*” ay kawalan ng *pananagutan*; ti nakabasol saan a madusa; kanayon a makalusot. Ti saan a husto agbalin a normal. Makalusot ti basol, ket agulimek laeng ti hustisia. Awan ti kabutbuteng dagiti adda iti turay. Tapno matengngeltayo dagiti adda iti turay a sungbatanda dagiti aramid (accountability), igaedtayo ti agtignay para iti pannakaipasa ti napudpudno nga *Anti-Dynasty Bill*. Nasken nga agtalinaed ti turay kadagiti tattao, saan ket nga iti sumagmamano.

**Agsiputtayo.** Mangbangontayo kadagiti *volunteer groups and movements* iti parroquia ken iti diocesis *for public accountability and monitoring of public funds, programs and projects*.

**Makipaset ken makibiangtayo.** Mangirugitayo ken makipasettayo kadagiti tungtongan, panagsasarita ken konsultasion no sadino a mangngegan ti timek dagiti tattao, tapno mairakurak ti *responsibility, transparency* ken *accountability*. Ti panagtataripnong kadagiti munisipio, ti pannakikonektar kadagiti sabsabali a grupo, institusion wenno organisasion, wenno dagiti naangay a *Trillion Peso Marches*, ket sumagmamano nga ehemplo ti daytoy.

**Suportarantayo dagiti nalinteg ken makabael a lideres** a mangpampanunot ti pagimbagan ti amin. Intay itultuloy ti panangadal kadagiti tattao tapno agbalinda a naimbag a makipagili ken maammoanda ti kaipapanan ti nasayaat a panangidaulo ken panagserbi, kas panagsagsaganatayo para iti panagbubutos inton 2028. Isapatayo nga irugi ti *Voters’ Education*. Ket lasinentayo no siasino ti napudno nga agserserbi ken ammoentayo no siasino ti nangrugin nga agkampania (*electioneering*).

Amin daytoy bikorena ti rebolusion: ti panagbalbaliw ti puso. Uppat a pulo a tawen kalpasan ti EDSA, minilyon pay laeng kadatayo ti balud ti kinakurapay ken rigat – gapu ta nagsublittayo kadagiti daan a kababalintayo. Masapultayo ti panagbalbaliw dagiti puso. Ta nasisita a maaramid nga umuna ti panagbalbaliw kadagiti bukodtayo a lugar: dagiti pagtengantayo, kumbento, parroquia, institusion, organisasion, asosasion, tigtignay, kongregasion ken diocesis.

Kamaudiananna, saantayo koma a liplipatan a **mapasamak laeng ti panagbalbaliw babaen ti gracia ti Dios**. Nagbanag ti EDSA para kadatayo a kas tanda ti ayat ken kaasi ti Dios. Saantayo a maawanan ti namnama, ta ti Dios impakaammona babaen ti Espiritu Santo “ti saan pay a nakita wenno nangngeg ti tao, ti saan nga impagarup ti tao a mapasamak, isu ti insagana ti Dios kadagiti agayat kenkuana”. (1 Cor 2:9) Agkakaragtayo a naimbag bayat ti panagtrabahotayo a naimbag.

Kakabsat, “laglagipenyo dagiti nakaskasdaaw nga inaramid ti Apo.” Mapnotayo koma manen iti isu met laeng nga espiritu a namagbunga iti People Power ti 1986. No amirisentayo, daydi a People Power ket ‘*synodality in action*’ – nagkikibin ken nagtignay a sangsangmaysa, nagkukuyogtayo a nagna iti pammati, namnama ken

ayat. ‘*Sulong-Padayon*’: daytoy ti awagtayo tapno makaballasiwtayo manipud pannakatagabu agturong iti wayawaya.

Iti unos ti 40 a tawen, nagallaalla dagiti Israelita sadiay let-ang. Kalpasan ti 40 a tawen, ken iti panangngilintayo kadagiti 40 nga aldaw ti Kuaresma, maawagantayo a mangbalbaliw manen ti pusotayo (*revolution of the heart*), puso nga agsubli iti Dios yantangay *malagipna dagiti nakaskasdaaw nga inaramid ti Apo*. Ti People Power ti 1986 ket ‘*kairos*’ – kanito ti grasia. *Lagipentayo* a siiyaman, *agbabawitayo* a sipapakumbaba ken *sumungbattayo* a situtured ken siaayat. Ipalagip ti Apo kadatayo “ay-ayatenka.” (Pal 3:9)

Maria, Ina ti pagilianmi, ikakaasim ti Pilipinas. Ket agari koma ti kappia iti dagami.

Para iti Catholic Bishops’ Conference of the Philippines

  
**+GILBERT A. GARCERA, D.D.**  
 Arsobispo ti Lipa  
 Presidente ti CBCP

*Note:* Mabalín a maidaton ti Misa Triduo kadagiti parrokia ken diocesis kas pangrampak ti maika-40 nga Anibersario ti EDSA iti naespirituan ken natalna a wagas. Maigunamgunam ti pannakaidaton kas panggep dagiti Misa ti panagbalbaliw ti sangkagimongan ken ti pagimbagan ti pagilian.